

Brev a mes commembers en vischnaunca (3)

Mes cars amitgs,

La regenza svizra ha previu in plan per abolir la bloccada dil virus da corona en treis pass. Entgins da nus quantan da veser ina glisch alla finiziun dil tunnel. El medem mument sa negin cu nus pudein bandunar dil tut quei stgir tunnel che nus traversein dapi in temps. Quei ei l'empregia en nossa veta ch'in semeigliant eveniment unescha igl entir mund. Quei virus para dad esser pli fermes ch'ils pli pussents regents dil mund.

Tuts ein pertuccai e sentan aunc adina la malsegirtad, tema e solitariadad entuorn nus. Fertan che nus sesin ella medema nav cun il rest dalla carstgaunadad e navighein tras aua furibunda stuein nus segidar in cun l'auter. Mo aschia savein nus contonscher la riva e surmontar il stemprau e las undas che vegnan producidas da quei virus. Quei ei nies inimitg communabel e nus stuein luvrar tuts ensemen.

Biaras naziuns sigl entir mund van entuorn auter cun quella crisa. Il futur vegn a mussar tgi che ha agiu endretg e tgi che ha disdiu. Mintgin da nus duei trer sias decisiuns persunalas per migliorar sia situaziun persunala dalla veta. Miu uestg ell'India ha raquintau a mi tschell'jamna ch'el seigi sedecidius da haver quitau in entir onn dad ina tochen duas famiglias basignusas ord mintga vischnaunca. El vegn a metter a disposizion bia resursas per segidar culs carstgauns. Quei ei buca bia, denton in grond e bi gèst. Semeigliants programs d'agid ein ord differents motivs buca necessaris cheu a Tujetsch, denton stuein esser pertscharts che nus essan buca independents dapertut.

Ei dat carstgauns entuorn nus che basegnan nies sustegn emoziunal, spiritual e psicologic. Savens ei quei pli impurtont che agid finanziar. Nus stuein dar forza als fleivels denter nus. Nus havein serrau las baselgias pil survetsch divin public, mo negin, cumpriu il virus, sa impedir nus dad arver nos cors e nos patratgs pils auters. En special rughein nus per las famiglias da Vigeli Hendry-Maissen (Sedrun) e Vigeli Giusp Berther-Hosang (Rueras) ch'ei mortis da cuort. Dieus regali a lur olmas il ruas perpeten. Jeu sincereschel che nus celebren la s. messa en baselgia cun l'entira vischnaunca inaga che la crisa ei vargada.

Entgins da nus mettan forsa en damonda l'existenza dad in bien e misericordeivel Diu cura ch'ei dat sil mund tonta tristezza. La risposta sin quella damonda ei che Dieus ha intimau nus dad agir en siu num per levgiar la dolor. Schei declarar mei quei culla suandonta historia: Il sulegl va da rendiu al horizon el vest. Cheu sedrezza il sulegl tuttenina viers il mund e tschenta la damonda: «Tgi sa purtar la glisch al mund suenter mia partenza?» Tuts queschan cunquei che negin sa remplazzar il sulegl. Cheu sepresenta in pign bau cazzola e di: «Jeu vegn a far miu pusseivel». In bau cazzola sa forsa gidar ina persuna da buca curdar tier tonta stgiradetgna. Dieus tschenta a nus oz la medema damonda.

Sche mintgin da nus en Tujetsch di: «Jeu dun il meglier pusseivel», lu daventa nies liug pli clars cun tonta glisch. Igl ei ironia che gest quei bi verset arriva dalla China nua ch'il virus ha carteivel siu origin: «Igl ei meglier dad envidar ina candeila che da smaedir la stgiradetgna.» Lein sespruar tuts dad esser ina glisch en in mund che daventa pli e pli stgirs. Lein era sespruar da reflectar la glisch da Cristus e da menar nos amitgs e famiglias alla glisch.

Ludaus sei Jesus Cristus, semper sei ludaus. Amen.